



FUNDARGERÐ SVEITARSTJÓRNAR

Fimmtudaginn 25. febrúar 2021 var fundur haldinn í sveitarstjórn Skagastrandar kl 8:30 á skrifstofu sveitarfélagsins.

Á fundinn voru mætt: Halldór Gunnar Ólafsson, Róbert Kristjánsson, Guðmundur Egill Erlendsson, Kristín Björk Leifsdóttir, Péturína Laufey Jakobsdóttir og Alexandra Jóhannesdóttir, sveitarstjóri.

Halldór Gunnar Ólafsson oddviti setti fundinn og stjórnaði honum. Sveitarstjóri ritaði fundargerð.

1. Skýrsla sveitarstjóra

Sveitarstjóri fór yfir verkefni sem unnið hefur verið að frá síðasta fundi. Skýrslan var flutt munnlega og til kynningar.

2. Gjaldskrá hunda- og kattahalds í sveitarfélaginu

Fyrir fundinum lá tillaga að breytingu á gjaldskrá hunda- og kattahalds í sveitarfélaginu sem sveitarstjóri kynnti. Sveitarstjórn ræddi framkomna tillögu og fól sveitarstjóra að vinna hana áfram samhliða því að leggja fram tillögu að breyttum samþykktum vegna hunda- og kattahalds í sveitarfélaginu.

3. Reglur um sérstakan húsnæðisstuðning

Fyrir fundinum lá tillaga um breytingu á reglum um sérstakan húsnæðisstuðning sem tóku gildi þann 1. janúar 2017. Sveitarstjórn ræddi tillöguna og fól sveitarstjóra að gera frekari breytingar á reglunum. Var afgreiðslu frestað fram til næsta fundar.

4. Drög að samningi um sameiginlegt þjónustuvæði á Norðurlandi vestra um þjónustu við fatlað fólk

Fyrir fundinum lágu drög að nýjum samningi um sameiginlegt þjónustuvæði á Norðurlandi vestra um þjónustu við fatlað fólk. Sveitarfélagið Skagafjörður er leiðandi sveitarfélag samkvæmt samningnum og gildir hann til eins árs með endurskoðunarákvæði í ársbyrjun 2022. Sveitarstjórn ræddi samninginn og samþykkti fyrirbyggjandi drög en



Sveitarstjórn Skagastrandar
Fundargerðir

leggur jafnframt áherslu á að samhliða nýjum samningi muni sveitarfélögin á Norðurlandi vestra standa að stofnun sjálfseignarstofnunar samkvæmt lögum nr. 52/2016 um byggingu og rekstur almennra leiguíbúða í íbúakjarna fyrir fatlað fólk.

5. Umsögn Sveitarfélagsins Skagastrandar vegna frumvarps til laga um breytingu á sveitarstjórnarlögum og lögum um tekjustofna sveitarfélaga til Umhverfis- og samgöngunefndar Alþingis

Fyrir fundinum lá umsögn Sveitarfélagsins vegna frumvarps til laga um breytingu á sveitarstjórnarlögum og lögum um tekjustofna sveitarfélaga til Umhverfis- og samgöngunefndar Alþingis. Í umsögn segir:

„Sveitarfélagið Skagaströnd tekur heils hugar undir innsenda tillögu starfshóps smærri sveitarfélaga á Íslandi. (Sjá meðfylgjandi).

Tillagan byggir á grunnildum lýðræðis og sjálfstjórnunarréttar sveitarfélaga og er í takt við meginsjónarmið í stefnumótandi áætlun um eflingu sveitarstjórnarstigsins sem samþykkt var á Alþingi á síðasta ári, einkum er varðar lýðræði, sjálfstjórnarrétt og sjálfbærni sveitarfélaga. Hún er jafnframt í góðu samhengi við sveitarstjórnarlög og fellur að þeim lagaramma sem fyrir er um sveitarfélög.

Sveitarfélagið Skagaströnd telur tillöguna vel til þess fallna að skapa breiða sátt um frumvarp Sveitarstjórnarráðherra til eflingar sveitarstjórnarstigsins á Íslandi.“

Tillaga smærri sveitarfélaga:

Til að vinna að eflingu og stækkun sveitarfélaga verði eftirfarandi ákvæði sett í lög í stað ákvæðis um 250/1000 íbúa lágmarksfjölda;

Þegar að loknum sveitarstjórnarkosningum og eigi síðar en 6 mánuðum eftir þær, skal sveitarstjórn taka til umræðu og meta hvort ástæða sé til að sveitarfélagið sameinist öðru eða öðrum sveitarfélögum.

Almenn umræða:

Þegar sveitarstjórn metur hvort horfa beri til sameiningar við önnur sveitarfélög, skal meðal annars horft til;

- Fjárhagslegra þátta, t.d. hvort vafi leiki á um rekstrarhæfi og sjálfbærni sveitarfélagsins til lengri tíma.*



Sveitarstjórn Skagastrandar
Fundargerðir

- Þjónustu, þar með talið hvort íbúar sveitarfélagsins njóti eða geti notið þeirra þjónustu sem þeim ber samkvæmt lögum og stjórnvaldsfyrirmælum, þar með talið vegna samstarfssamninga sveitarfélaga um afmörkuð verkefni.
- Félagsslegra þátta, t.d. hvort sveitarfélagið sé hæfileg samfélagsleg eining.
- Annarra þátta sem sveitarstjórn kann að telja mikilvæga, t.d. samstarf við önnur sveitarfélög, íbúapróun og landfræðilegar aðstæður.

Sé það mat sveitarstjórnar að rétt sé að skoða sameiningu við annað eða önnur sveitarfélög hefst viðræðuferill. Sveitarstjórn skal kynna niðurstöðu almennrar umræðu fyrir íbúum, að lágmarki með bókun í fundargerð sem birt er á heimasíðu sveitarfélagsins.

Nú hefur sveitarstjórn metið það svo eftir almenna umræðu að eigi sé þörf fyrir sameiningu. Íbúar geta þá óskað eftir því með undirskriftum að lágmarki 15% kosningabærra manna m.v. síðustu sveitarstjórnarkosningar, að sameiningarkostir verðir metnir og boðað til íbúakosningar um þá. Er þá sveitarstjórn skylt að verða við þeim óskum og hefja viðræðuferil, enda verði því við komið innan kjörtímabilsins.

Sértæk umræða:

Eftveir eða fleiri af eftirtöldum þáttum eiga við, þegar horft er til síðustu fjögurra ára, skal sveitarstjórn hafa sértæka umræðu. Sveitarstjórn skal þá leitast við að greina orsakir fyrir slæmri þróun, rýna í horfur til næstu ára og meta hvort meiri líkur séu á farselli þróun með sameiningu við annað eða önnur sveitarfélög. Sérstaklega skal metið hvort þróunin er umtalsverð og viðvarandi, hvort um sérstakar ástæður er að ræða sem sér fyrir endann á, eða óveruleg frávík sem í engu ógni framtíð sveitarfélagsins.

Þættirnir eru:

1. Sveitarfélagið hefur ekki náð að standast fjárhagsleg viðmið í lögum, s.s. um skuldaviðmið og/eða jafnvægisreglu.
2. Skuldahlutfall er hátt miðað við sambærileg sveitarfélög og hefur farið hækkandi.
3. Íbúatala hefur farið lækkandi.



Sveitarstjórn Skagastrandar
Fundargerðir

4. Framlög Jöfnunarsjóðs sem hlutfall af tekjum eru há miðað við sambærileg sveitarfélög og hafa farið hækkandi.

Ákveði sveitarstjórn eftir sértæka umræðu að ekki sé ástæða til að hefja viðræðuferil um sameiningu, skal hún rökstyðja það álit sitt og senda til ráðuneytis sveitarstjórnarmála. Ráðuneytið fer yfir mat sveitarstjórnar og getur eftir atvikum gefið álit sitt og sent sveitarstjórn. Telji ráðuneytið ástæðu til að fylgja málinu frekar eftir, færist það á borð eftirlitsnefndar með fjármálum sveitarfélaga og vinnur nefndin þá að því eftirleiðis í samræmi við hlutverk sitt og starfsreglur.

Sveitarstjórn skal kynna íbúum sínar ákvarðanir og rökstuðning eftir sértæka umræðu, að lágmarki sem bókun í fundargerð sem birt er á heimasíðu sveitarfélagsins. Einnig skal kynna íbúum álit ráðuneytis með fullnægjandi hætti, ef við á, t.d. á heimasíðu sveitarfélagsins.

Nú hefur sveitarstjórn metið það svo eftir sértæka umræðu að eigi sé þörf fyrir sameiningu. Íbúar geta þá óskað eftir því með undirskriftum að lágmarki 10% kosningabærra manna m.v. síðustu sveitarstjórnarkosningar, að sameiningarkostir verðir metnir og boðað til íbúakosningar um þá. Er þá sveitarstjórn skylt að verða við þeim óskum og hefja viðræðuferil, enda verði því við komið innan kjörtímabilsins.

Viðræðuferill:

Sé það mat sveitarstjórnar eða vilji nægjanlegs hlutfalls íbúa með undirskriftum sínum, að rétt sé að skoða sameiningu við annað eða önnur sveitarfélög, skal sveitarstjórn (láta) stilla upp valkostum, einum eða fleiri, um sameiningu auk valkosta um að hafna tillögu um sameiningu. Valkostina skal leggja fyrir í íbúakosningu að undangenginni kynningu. Samþykki íbúar einn eða fleiri sameiningarkosti með einföldum meirihluta skal sveitarstjórn án tafar leita eftir afstöðu hlutaðeigandi sveitarfélags/sveitarfélaga til viðræðna. Hafni íbúar þeim sameiningarkostum sem sveitarstjórn leggur fyrir verður ekki lengra gengið að sinni.

Nú óskar sveitarfélag eftir sameiningarviðræðum við annað eða önnur sveitarfélög að undangenginni íbúakosningu. Skal (skulu) þá hlutaðeigandi sveitarstjórn(ir) án tafar



Sveitarstjórn Skagastrandar
Fundargerðir

efna til kynningar og íbúakosningar um að ganga til þeirra viðræðna eða hafna viðræðum. Samþykki íbúar að ganga til viðræðna um sameiningu hefja sveitarstjórnirnar það ferli sbr. XII kafla sveitarstjórnarlaga. Hafni íbúar sveitarfélags því að ganga til viðræðna verður ekki lengra gengið að sinni í því sveitarfélagi.

Sveitarstjórnir geta haft samráð sín á milli við umræður og undirbúning viðræðna þannig að hægt sé að hafa íbúakosningu í fleiri en einu sveitarfélagi á sama tíma.

Heimilt er að láta kosningar um ofangreinda valkosti fara fram með rafrænum hætti.

Þegar sveitarfélög, tvö eða fleiri, hafa ákveðið að ganga til sameiningarviðræðna fer ferlið eftir ákvæðum XII kafla sveitarstjórnarlaga og lýkur með kosningum íbúa. Íbúar skulu jafnan vel upplýstir um þá vinnu sem fram fer og þeim gefinn kostur á að hafa áhrif á gang mála t.d. með íbúafingum og/eða rafrænum viðhorfskönnunum.

Sveitarfélög sem leggja í viðræðuferil geta sótt um styrk til þeirrar vinnu til ráðuneytis/Jöfnunarsjóðs. Styrkur getur verið í formi fjármuna og/eða sérfræðiráðgjafar. Ráðuneytinu ber sérstaklega að aðstoða sveitarfélög ef viðræðuferill fer af stað eftir sértæka umræðu og eftir atvikum álitsgjöf ráðuneytisins, hvort heldur er með fjárstyrk eða sérfræðiráðgjöf.

6. Trúnaðarmál

Afgreiðsla sveitarstjórnar bókuð í trúnaðarbók.

7. Bréf

a. Tölvupóstur Blönduósbæjar dags. 15. janúar 2021

Með póstinum er óskað eftir því að kostnaðarskipting byggðasamlaga vegna 2020 og 2021 verði endurskoðuð þar sem að réttar forsendur hafi ekki verið notaðar við útreikninga. Sveitarstjórn telur ekki þörf á því að breyta þeirri vinnureglu sem viðhöfð hefur verið. Ef leggja á í slíka vinnu er æskilegt að það sé gert frá upphafi samstarfsins.

b. Umhverfisstofnunar dags. 26. janúar 2021

Með erindinu er vakin athygli á því að skv. 2. mgr. 11. gr. reglugerðar nr. 1010/2012 um viðbrögð við bráðamengun hafs og stranda skuli hafnir fyrir 1. mars ár hvert skila til Umhverfisstofnunar, með afriti til mengungarvarnarráðs, uppfærðri viðbragðsáætlun og skýrslu um mengungarvarnaræfingar árið á undan, notkun mengungarvarnarbúanaðar, mati á ástandi hans og þörf á endurnýjun ásamt upplýsingum um bráðamengun sem orðið hefur í höfninni og hvernig við henni var brugðist. Var sveitarstjóra falið að svara erindinu.



Sveitarstjórn Skagastrandar
Fundargerðir

c. Umhverfisstofnunar dags. 3. febrúar 2021

Með erindinu er kallað eftir endurskoðun á áætlun hafnaryfirvalda á áætlun um móttöku úrgangs og farmleifa frá skipum sbr. 6. gr. reglugerðar nr. 1200/2014. Var sveitarstjóra falið að skila inn uppfærðri áætlun.

d. Sambands íslenskra sveitarfélaga dags. 26. janúar 2021

Með erindinu er boðað til XXXVI. Landsþings Sambands íslenskra sveitarfélaga sem haldið verður þann 26. mars nk. Erindið var lagt fram kynningar.

e. Lánasjóðs sveitarfélaga dags. 8. febrúar 2021

Með erindinu er auglýst eftir framboðum í stjórn Lánasjóðs sveitarfélaga. Erindið var lagt fram til kynningar.

8. Fundargerðir

a. Stjórnar Sambands íslenskra sveitarfélaga dags. 16.12.2020

Fundargerð var lögð fram til kynningar.

b. Stjórnar Sambands íslenskra sveitarfélaga dags. 29.01.2021

Fundargerð var lögð fram til kynningar

c. Stjórnar Hafnasambands Íslands dags. 22.01.2021

Fundargerð var lögð fram til kynningar.

d. Stjórnar SSNV dags. 02.02.2021

Fundargerð var lögð fram til kynningar.

9. Önnur mál

Fram kom að Þröstur Líndal fulltrúi í hafnar- og skipulagsnefnd hafi ekki kjörgengi lengur á Skagaströnd. Því verður Guðmundur Egill Erlendsson skipaður í nefndina í hans stað.

Fleira var ekki tekið fyrir og fundi slitið kl. 10:45




Sveitarstjórn Skagastrandar
Fundargerðir


Halldór G. Ólafsson


Róbert Kristjánsson


Kristín B. Leifsdóttir


Péturína Laufey Jakobsdóttir


Guðmundur Egill Erlendsson


Alexandra Jóhannesdóttir

